

Īsā Masīh par Kyoñ Bharosā

Chār Thos Gawāh



īsā masīh par kyon̄ bharosā: chār ṭhos gawāh
Why We Trust in Isa Masih: Four Witnesses

by Bakhtullah

[*Ao, Khud Dekh Lo 11*]

(Urdu—Roman script)

© 2023 www.chashmamedia.org
published and printed by
Good Word, New Delhi

The title cover has been derived by permission from
Bible Society Australia – The Wild Bible
<https://freebibleimages.org/illustrations/wb-john-baptist/>.

Bible quotations are from UGV.

for enquiries or to request more copies:
askandanswer786@gmail.com

Fahrist

| | |
|---------------------------------------|-----------|
| Pahlā Gawāh: Yahyā Nabī | 2 |
| Dūsarā Gawāh: Īsā Masīh ke Kām | 3 |
| Tīsrā Gawāh: Ḳhudā Bāp | 4 |
| Chauthā Gawāh: Pāk Nawishte | 7 |
| Insān kī Izzat Yā Ḳhudā kī? | 8 |
| Injīl, Yūhannā 5:30-47 | 11 |

Īsā Masīh kī tālīm anokhī thī. Yih aisi bāteñ thīñ jo sirf aur sirf al-Masīh kar saktā thā. Sunane wāloñ ne sochā, yih to baṛī baṛī bāteñ haiñ.

► *Lekin ham kis tarah jāñ sakte haiñ ki uskī yih bāteñ sach haiñ? Ki wuh sachmuch al-Masīh hai?*

Yih hamāre lie bhī ek ahm sawāl hai.

► *Ham kis tarah uskī bātoñ par bharosā kar sakte haiñ?*

Īsā Masīh logoñ kā yih sawāl jāntā thā. Ek mauqe par us ne iskā jawāb bhī diyā.

► *Jawāb kyā thā?*

Jawāb meñ us ne farmāyā ki mere chār gawāh haiñ. Aise ṭhos aur pakke gawāh jo koī bhī jhūṭhe nahīñ ṭhahrā saktā.

Pahlā Gawāh: Yahyā Nabī

Pahlā gawāh Yahyā nabī hai. Jab Yahyā Dariyā-e-Yardan par logoñ ko baptismā dene lagā to buzurg us ke pās āe. Wuh jānanā chāhte the ki yih apne bāre meñ kyā kahtā hai. Kyā yih Masīh to nahīn hai? Yahyā ne sāf jawāb diyā ki main Masīh nahīn hūñ. Lekin ek din jab Īsā Masīh hāzir huā to Yahyā ne farmāyā ki yahī āne wālā Masīh hai:

Maiñne dekhā ki Rūhul-quds kabūtar kī tarah āsmān par se utarkar us par ṭhahr gayā. Main to use nahīn jāntā thā, lekin jab Allāh ne mujhe baptismā dene ke lie bhejā to us ne mujhe batāyā, ‘Tū dekhegā ki Rūhul-quds utarkar kisī par ṭhahr jāegā. Yih wuhī hogā jo Rūhul-quds se baptismā degā.’ Ab maiñne dekhā hai aur gawāhī detā hūñ ki yih Allāh kā Farzand hai.

(Yūhannā 1:32-34)

Yoñ Yahyā nabī ne sāf farmāyā ki Ḳhudāwand Īsā al-Masīh hai, wuh jo najāt dene ke lie duniyā meñ

bhejā gayā hai. Islie Īsā Masīh ne Yahyā ke bāre meñ farmāyā,

Yahyā ek jaltā huā charāgh thā jo raushnī detā thā. (Yūhannā 5:35)

► *Yahyā kyon charāgh thā?*

Charāgh andhere ko raushan karke hamēñ rāstā dikhātā hai. Yahyā nabī ne rūhānī andhere ko raushan karke Masīh kā rāstā dikhāyā.

Dūsrā Gawāh: Īsā Masīh ke Kām

Yahyā kī gawāhī ahm thī, lekin wuh insān kī gawāhī thī. Do aur gawāh zyādā ahm haiñ.

► *Kyon?*

Islie ki wuh insānī gawāh nahīñ haiñ. Masīh ne farmāyā,

Mere pās ek aur gawāh hai jo Yahyā kī nisbat zyādā ahm hai yāñī wuh kām jo Bāp ne mujhe mukammal karne ke lie de diyā. (Yūhannā 5:36)

- *Yih kis qism ke kām the jo Masīh ke gawāh the?*
Ḳhudāwand Masīh kī pāk zindagī, us ke mojize aur uskā kalām. Yih sab sāf sāf uskī gawāhī dete the.

Tīsrā Gawāh: Ḳhudā Bāp

Tīsrā gawāh Ḳhudā Bāp hai. Īsā Masīh ne farmāyā,

Is ke alāwā Bāp ne Ḳhud jis ne mujhe bhejā hai mere bāre meñ gawāhī dī hai.
(Yūhannā 1:37)

- *Ḳhudā Bāp ne kis tarah gawāhī dī?*
Jab Yahyā nabī Īsā Masīh ko baptismā de rahā thā to likhā hai ki

Jab wuh duā kar rahā thā to āsmān khul gayā aur Rūhul-quds jismānī sūrat meñ kabūtar kī tarah us par utar āyā. Sāth sāth āsmān se ek āwāz sunāī dī, “Tū merā pyārā Farzand hai, tujh se mainḱ Ḳhush hūñ.” (Lūqā 3:21-22)

Kisī aur din Īsā Masīh tīn shāgirdon ke sāth ek ūnche pahār par chaṛh gayā ki achānak Mūsā aur Ilyās zāhir hokar us se bāteñ karne lage.
Achānak

Ek chamakdār bādāl ākar un par chhā gayā aur bādāl meñ se ek āwāz sunāī dī, “Yih merā pyārā Farzand hai, jis se main khush hūn. Is kī suno.” Yih sunkar shāgird dahshat khākar aundhe muñh gir gae.

(Mattī 17:5-6)

Lekin shāyad Masīh zyādā yih wāqiyāt yād nahīn kar rahā thā. Kyonki is bāt ke ain bād us ne ek qism kī pahelī pesh kī. Us ne farmāyā,

Afsoś, tum ne kabhī uskī āwāz nahīn sunī, na uskī shakl-o-sūrat dekhī, aur uskā kalām tumhāre andar nahīn rahtā, kyonki tum us par imān nahīn rakhte jise us ne bhejā hai.

(Yūhannā 5:37-38)

► *Kyā koī insān sīdhe Ḳhudā kī āwāz sun saktā hai?*

Hargiz nahīn!

- *Kyā koī insān uskī shakl-o-sūrat dekh saktā hai?*

Hargiz nahīn!

- *To phir Īsā Masīh kā kyā matlab hai?*

Ham pahelī kā hal tīn sawāloñ se kar sakte haiñ.

- *Yahūdī buzurgoñ ne Ḳhudā Bāp kī āwāz kyoñ na sunī?*

Īsā Masīh un ke darmiyān thā aur unheñ Ḳhudā Bāp kī āwāz sunātā thā. Wuh yih kalām sunte to the magar uskī āwāz un ke diloñ tak nahīn pahuñchtī thī. Wuh rūhānī bahre the.

- *Yahūdī buzurgoñ ne Ḳhudā Bāp kī shakl-o-sūrat kyoñ na dekhī?*

Īsā Masīh Ḳhudā Bāp ko un par zāhir kartā thā magar wuh us meñ Ḳhudā kī shakl-o-sūrat nahīn pahchān sakte the. Wuh rūhānī andhe the.

- *Ḳhudā Bāp kā kalām Yahūdī buzurgoñ ke diloñ meñ kyoñ nahīn bastā thā?*

Īsā Masīh Ḳhudā kā kalām thā, aur wuh un ke darmiyān thā. Lekin wuh us par īmān nahīn rakhte the, islie un ke dilon meñ nahīn bastā thā.

Ġharz chūnki Īsā Masīh Ḳhudā kā kalām hai islie wuh Ḳhudā Bāp kī āwāz sunātā aur uskī shakl-o-sūrat zāhir kartā thā. To bhī aksar Yahūdī buzurgoñ ne use qabūl na kiyā. Unhoñ ne yih gawāhī apne dilon meñ basne na dī. Jis tarah Yūhannā rasūl farmātā hai ki

Allāh kī gawāhī yih hai ki us ne apne Farzand kī tasdīq kī hai. Jo Allāh ke Farzand par īmān rakhtā hai us ke dil meñ yih gawāhī hai.

(1 Yūhannā 5:9-10)

► *Kyā Ḳhudā kī gawāhī āpke dil meñ bastā hai?*

Chauthā Gawāh: Pāk Nawishte

Pāk nawishte bār bār Masīh kī peshgoī karte haiñ. Islie Ḳhudāwand Masīh ne Yahūdī buzurgoñ par afsos kiyā,

Tum apne sahifon mein dhundhte rahte ho kyunki samajhte ho ki un se tumhein abadi zindagi hasil hai. Lekin yahī mere bare mein gawāhī dete hain! To bhī tum zindagi pane ke lie mere pas ana nahin chahate.

(Yuhanna 5:39-40)

Kitni alamnāk bāt. In buzurgoñ ko mālūm thā ki pāk nawishton se abadi zindagi milti hai. Wuh us mein dhundhte rahte the magar be-fāyda. Dhundhne mein kāmyābī us waqt hoti hai jab Rūhul-quds hamārī rūhānī ānkhoñ ko khol detā hai. Tab hī hamen samajh āti hai ki pāk nawishte Īsā Masīh kī thos gawāhī dete hain. Tab hī wuh hamāre dil mein basne lagtā hai, rag rag mein dharakne lagtā hai. Masīh kī muhabbat, uskī zindagi, uskā rahm, hān uskā pūrā wujūd ham mein basne lagtā hai.

Insān kī Izzat Yā Kḥudā kī?

- *Jab Īsā Masīh ke itne thos gawāh hain to Yahūdī buzurg kyon us par imān nahin lā sakte the?*

Ḳhudāwand Masīh ne ḳhud iskā jawāb diyā,

Koī aḳab nahīn ki tum īmān nahīn lā sakte. Kyoṅki tum ek dūsre kī izzat chāhte ho jabki tum wuh izzat pāne kī koshish hī nahīn karte jo wāhid Ḳhudā se miltī hai. (Yūhannā 5:44)

Īsā Masīh īmān na rakhne kī zahrīlī jaṛ zāhir kartā hai.

► *Wuh kyā hai?*

Buzurg itne zor se apnī izzat ke pīchhe paṛe rahte the ki wuh us izzat ke lie andhe the jo Ḳhudā detā hai. Jo bhī dhūmdhām se un kī izzat kartā thā us se wuh lipaṭ jāte the. Is ke muqābale meṅ Masīh sirf aur sirf Ḳhudā Bāp se izzat pānā chāhtā thā. Use buzurgoṅ se izzat milne kī parwā hī nahīn thī. Uskā pūrā dhyān Ḳhudā Bāp kī marzī pūrī karne par thā. Wuh ḳhūb jāntā hai ki dūsroṅ kī taraf se milī izzat par bharosā nahīn kiyā jā saktā.

- *Kyā āp sachmuch sirf KḤudā se izzat milnā chāhte haiñ?*

Agar nahīñ to āp buzurgoñ kī tarah andhe haiñ. Tab wuh bāt āp par bhī sādīq āegī jo Masīh ne buzurgoñ ke bāre meñ farmāyā,

Yih na samjho ki main Bāp ke sāmne tum par ilzām lagāūngā. Ek aur hai jo tum par ilzām lagā rahā hai yāñī Mūsā. (Yūhannā 5:45)

- *Mūsā nabī kyon un par ilzām lagā rahā hai?*

Islie ki un kā pūrā dhyān us izzat par thā jo insān kī taraf se hai. Islie wuh shariyat ke rūhānī usūloñ ke lie andhe ho gae the. Agar wuh sachmuch Mūsā nabī kī bātoñ yāñī shariyat par imān rakhte aur amal karte to wuh Īsā Masīh par bhī imān lāte.

Ġharz, Īsā Masīh ke chār ṭhos gawāh haiñ. To bhī buzurg apñī izzat ke bāis us par imān nahīñ lā sakte the.

Yih ek ahm bāt hai.

- *Kyā āp apnī izzat bachāne yā baḥhāne kī koshish meñ Īsā Masīh par īmān nahīn lā sakte?*

Yād rakho ki us ke chār ṭhos gawāh haiñ: Yahyā nabī, us ke kām, Ḳhudā Bāp aur pāk nawishte.

Injīl, Yūhannā 5:30-47

Main apnī marzī se kuchh nahīn kar saktā balki jo kuchh Bāp se suntā hūn us ke mutābiq adālat kartā hūn. Aur merī adālat rāst hai kyonki main apnī marzī karne kī koshish nahīn kartā balki usī kī jis ne mujhe bhejā hai. Agar main ḳhud apne bāre meñ gawāhī detā to merī gawāhī motabar na hotī. Lekin ek aur hai jo mere bāre meñ gawāhī de rahā hai aur main jāntā hūn ki mere bāre meñ uskī gawāhī sachchī aur motabar hai. Tum ne patā karne ke lie apne logoñ ko Yahyā ke pās bhejā hai aur us ne haqīqat kī tasdīq kī hai. Be-shak mujhe kisī insānī gawāh kī zarūrat nahīn hai,

lekin main̄ yih islie batā rahā hūn tāki tum ko najāt mil jāe. Yahyā ek jaltā huā charāgh thā jo raushnī detā thā, aur kuchh der ke lie tum ne uskī raushnī meñ ḡhushī manānā pasand kiyā.

Lekin mere pās ek aur gawāh hai jo Yahyā kī nisbat zyādā ahm hai yānī wuh kām jo Bāp ne mujhe mukammal karne ke lie de diyā. Yahī kām jo main̄ kar rahā hūn mere bāre meñ gawāhī detā hai ki Bāp ne mujhe bhejā hai.

Is ke alāwā Bāp ne ḡhud jis ne mujhe bhejā hai mere bāre meñ gawāhī dī hai. Afsos, tum ne kabhī uskī āwāz nahīn sunī, na uskī shakl-o-sūrat dekhī, aur uskā kalām tumhāre andar nahīn rahtā, kyonki tum us par īmān nahīn rakhte jise us ne bhejā hai.

Tum apne sahīfoñ meñ ḡhūndte rahte ho kyonki samajhte ho ki un se tumheñ abadī zindagī hāsil hai. Lekin yahī mere bāre meñ

gawāhī dete haiñ! To bhī tum zindagī pāne ke lie mere pās ānā nahīñ chāhte.

Maiñ insānoñ se izzat nahīñ chāhtā, lekin maiñ tum ko jāntā hūñ ki tum meñ Allāh kī muhabbat nahīñ. Agarche maiñ apne Bāp ke nām meñ āyā hūñ to bhī tum mujhe qabūl nahīñ karte. Is ke muqābale meñ agar koī apne nām meñ āegā to tum use qabūl karoge. Koī ajab nahīñ ki tum īmān nahīñ lā sakte. Kyoñki tum ek dūsre se izzat chāhte ho jabki tum wuh izzat pāne kī koshish hī nahīñ karte jo wāhid Ḳhudā se miltī hai. Lekin yih na samjho ki maiñ Bāp ke sāmne tum par ilzām lagāūngā. Ek aur hai jo tum par ilzām lagā rahā hai yānī Mūsā, jis se tum ummīd rakhte ho. Agar tum wāqāī Mūsā par īmān rakhte to zarūr mujh par bhī īmān rakhte, kyoñki us ne mere hī bāre meñ likhā. Lekin chūñki tum wuh kuchh nahīñ mānte jo us ne likhā hai to merī bāteñ kyoñkar mān sakte ho!